

Adios amicu

Sonetto dedicato all'amico Augusto Flaminio Piras

Ascras de luna dae corraleddu
in s'orulu'e sa die vagabunda
a orriolu fin fachende runda
tintas'a piche luridu tittieddu.

Una lantia zirand'a gromereddu
pasada s'est in sa pettorra bunda
frimande cudda vida prus pruffunda
in s'animu su sinu e su cherveddu.

E tue caru amicu ses peridu
chircand'in s'ala un'ispera'e luce
su coro a s'amargura m'has chistidu.

Juco in sas oras s'animu sentidu
isprico cust'iscutta in custa ruche
chin astulas su chelu m'hat feridu.

Adios Mario

Dedicata all'amico Mario Portas

Una oche d'attarzu in sas aeras
f'it muttinde unu lazaru a sa sorte
e un'arrida campana in mesu corte
istronat chin su sonu sas carreras.
A orulos in artu fin sas feras
zarulande s'ostinu prus a forte
e una puppa niedda ch'it sa morte
t'it falande in chisina sas isperas.
Sas cheras fini rajos de repente
sas frinas fini lacrimas de prantu
sas lantias fini ruches de ponente.
Una manu puntada dae s'oriente
muttiu t'hat a tie atter'ettantu
a nue non podet esse mai assente

Apprendo con sorpresa la morte del caro amico Mario Portas di Castelsardo ma residente a Tergu a dir la verità mi sento addolorato perchè al dilà del poeta che s'incontrava nei vari concorsi dell'isola,manca un'amicouna persona corretta e galantecon il suo modo di salutare sincero daltronde come gli altri poeti scomparsi Pinuccio Giudice Marras-e Nanni Molinero.
Penso che quando mancano i poeti, il Giardino incantato delle muse rimanga spoglio dei suoi fiori.

(24-12-2011)

A Luisi e Maria

Custu Nadale siat s'istandardu
de paches e de chimas
d'armonia
pottat frorire s'annu in s'allegria
dae prima die a s'urtima
e a tardu.
Po cantu cheres e cantu disizas
po cantos annos sos chi
cheres tue
happas salute e sa muzere in cue
sempere in s'ala chin fizos
e fizas.
E donzi sole chin sa luce noa
pottat frorire torra su
sementu
e tue in sa vida che fizu in sa coa.
Pottas connosche sos
chentu Nadales
innidu sanu sempere cuntentu.
chene dolores e chene sos
males.
Auguri

A medas annos

A tziu Gasparru Mele Auguri

Trazandet'una luna a pilu resu
e a frammarida sos annos in pittu
ti mudan che massaiu in d'unu sittu
una corona'e annos fachen pesu.

Su chelu t'hat premiadu t'hat intesu
chin d'una voluntade pres'a chittu
e t'hat lassadu in vida po dirittu
e paris sos sentidos chi has prettesu.

E una salude rara canterina
cumpanza solu tua in cussos annos
t'hat fatt'in sa campagna de meichina.

Nen gherras in sa vida nen faina
ne ifferros chin su ocu ne malannos
non dommana sa sorte bragherina.

Po custu tziu Gasparru chen'affannos
pos preco de isparghe sa drottina
ch'isticchit su misteru'e sos prus mannos.

A netta mia

04/12/2014

Oje cantan in coro sas chimeras
e custa luna lantiat'a sa fronte
artas isperas si pesan dae monte
e alluen a framma tottu sas'aeras
tue chentu puntos oje t'ind'ameradas
po los pintare in s'arcu'e s'orizonte
chin tecus tue has fattu cuss'irfida
po diventares laureada ischida.
Colat su tempus Marinedda rara
e aperis sas alas dae su nidu
po nd'ispiccare bolos de sentidu
pones saviesa in donzi prica'e cara
s'impinnu t'ò oje has postu in gara
b'ènit premiadu s'istudiu servidu
arrumbat gherrajola a menzus sorte
fin'a chent'annos finas'a sa morte.
E de sa vida su menzus sentore
chircalu semper'in oras d'incantu
ca su travallu coment'unu Santu
si precat semper'e prenu d'amore.
donzi mundanu bocat su suore
pattit prus forte e meda po cantu
son tribuladas sas oras de chie
hat istudiau e meda che a tie.
Pesan'in palas oras passidoras
chi nd'has ascau in carchi mementu
chin su puntillu chimas de talentu
po dar'irfogu a pazinas sonoras
a libru in manos interi sas oras
has tessiu in mente unu bon'amentu
has postu in usu sa menzus manera
e nd'has mantesu arta sa cantera.
Marina unu chentu altu elevau
chi dominat addiscros e pianuras
secadu has de s'istirpe sas cresuras
ca non b'haiat unu istudiau
a rispostas de tesi no has mancau
ca fisti pronta chin zustas misuras
jeo t'auguro travallos a piacheres
e s'amore chi chircas su chi cheres.

Astula'e ocu

Mensione speciale a Ittiri anno 2011

Ses che astula'e ocu in custu sinu
in cust'anima bene amadricada
che una rosa c'aperit sa zirada
e mudat custu coro che zardinu.
Ses un'astru c'acchirrat porporinu
e ti lassat intessia sa colada
che una luna luchente appaneddada
e sa lantia nd'ispianat su camminu.
Chilliamillos in coro sos mementos
iscrittos son'a bisos d'armonia
a caddu de sos lampos e sos bentos.
E lassan in sa terra sos sementos
e in francas e in chimas de ulia
arrumban ben'istrintos sos ammentos.

A Tie Mamma

Po sos chent'annos.

Aguri a medas'annos.

Naschida dae tempus furistera
de milli benes e de cosas raras
basandet una luna d'oro in laras
po favoriret cussa caminera.
O fada chi m'has dadu custa luce
e nove meses m'has trazad'in sinu
intendo sas campanas de s'ostinu
chi sonan festas chin s'eterna ruche.
E rides galu cantas ca ses bia
tocas su chentenariu ch'est de oro
a nottas chi nde grinan armonia.
Su tempus in sa cara su decoro
lassat in donzi prica ch'est a ria
pintad'a sentimentu intro su coro.

Augurios

Auguri Per Natale 2015 e felice Anno Nuovo

Sonetto Dedicato a Luigi Ladu e la moglie Maria

Su tempus tou presu chin cadenas
a nellas e a ganzos de sentidu
su entu chi nd'assuttat in sas penas
valores chi s'anticu nd'hat chistidu.

Custu Nadale in pittu'e sas carenas
carinnet su mundanu sanu ischidu
chin paches e chin lodes sas terrenas
e siat'a chent'annos gal'unidu.

E tue Luisi sias s'istendardu
po sa cultura chin su mann'impinnu
campande chin Maria su prus tardu.

Po s'amichessia ti aco unu carinnu
arrumbes bene chertu che unu sardu
chi trazat chin sa fide bonu sinnu.

Auguri... Po Nadale e Annu Nou

Custu Nadale siat s'intendardu
pintirinau 'e pache e de salude
in manos jucas pricas de virtude
po cantu campas tue inas'a tardu.
E chin maria sempes sias sardu
prenu de grabu e mai sias rude
mai ispinas boches chei su gardu
siat po tene sa rosa in sa palude.
E alligru mantene' in s'incantu
fin'a chent'annos settiu in zaminera
ca sa muzere servit meda e cantu.
Mantenet arta sempes sa bandera
ca est pintada 'e amore meda tantu
a frammarida cundit cad'aera.
In d'una lantia luchet unu mantu.

Bae....Tempus...bae

Unu barbone oje ido aperinde
una cresura antica'e sas aeras
in chimas'e custos annos it pedinde
unu bicculu'e pane a sas isperas.

Su tempus che gutturzu fit tuinde
fit gramuzande montes e gabras
e fit rucande donzi camineras
finas'a bide sa terra ispilinde.

Oje est nadale cada poverittu
pottat torar'a bide su eranu
si tattet torra de petta'e crapittu.

Cambiet tottu cambiet su mundanu
e su corrottu siat in donzi sittu
trattadu che ladrone e che profanu.

chi finat de furare in bassu e in pittu.

Bidda mia

Dedicata a Dorgali

Allegami a s'iscusiu lena lena
inoche in santu Bacchis in s'arzola
terra d'ispicas chi biazas e sola
reina'e sa Sardigna ses armena.
Terra de mare de frumenes montes...
terra'e olivares de binzas ricchesa
terra'e pasturas de casos po mesa
terra'e sennores de villas de contes.
In sas arturas sas muvras'a mantu
melan a forte a filu'e orizonte
b'est frumeneddu chi falat'a ponte
Tiscali anticu ch'isticchit s'incantu.
B'est Caderina s'antica mattrona
frorit sa fide in mesu s'artare
Santu zoseppe chi nos cheret dare
cussizos bonos po cad'arte bona.
B'est cara a mare llune dorada
po su turista unu locu d'incantu
terra'e poesias chi frorin a mantu
terra'e tenores a boche'e pesada.
Terra'e nuraghes bene custodidos
terra de janas de musas fadadas
terra'e orulettas zambellas seàdas
terra'e turismu de riccis servidos.
Terra d'uresis pintados chin s'oro
zoigas pintadas in sinos d'ispantu
ballu a tres passos a nottas d'incantu
ses una terra chi mudat su coro.

Bint'annos

Segnalazione al "Premio Quartucciu 2009"

A 'ue ses andata luna bianca
chi su intinu ruju 'e pedde'e seda
sos suspiros caentes dae meda
son'isparidos in sa cara franca.
Pares c'appa ziradu s'infinidu
in chimas de sas nues assoladas
e a travuntanas bassas intregadas
sas iscuttas d'amore c'as cundidu.
Epuru fisti bella e su sentidu
fit coronande sa mamma natura
como onzi priga paret prus madura
interi cara a chizu incanudidu.
Serrados in su coro sos ammentos
son arrumbados de sa zoventude
sutta sa tritzas prenas de virtude
in antigos prus lughidos mementos.
E in chelos artos de sa fantasia
fimis bolande po connosche mundu
una (Frora)'e chimeras a intundu
supra sas musas de sa poesia.
Unu cantaru'e amore una funtana
una 'ena isticchidda prus madura
fattu e joghittos po chircar'a fura
lughes d'amore in s'anima galana.
E ca t'istimo jeo t'amiro ancora
che crapiola chi melat in su monte
sos pilos chi t'adornana sa vronte
son fattos de ispicas de cudd'ora.
Bolados son che frores de s'edade
sos annos d'unu durche incantamentu
bolados son'in palas de su 'entu
chin sos birbillios de s'eternidade.
T'ido galu baghiana post'a banda
cà a Deus non si cuat sa fortuna
prima fisti prus bianca d'una luna
e sas laras prus rujas d'una tanda.
Como sa 'etzesa ghattat su lettolu
chi cucuzzat sa madrighe bellea
povera...rosa...pares resa resa
chircande sos bint'annos de cossolu.

Bisos de pratta

Secondo Premio (Prantaferru2012)

Non cheret...
mimulas...anzenas...
su entu majarzu custa notte...
in s'incudine'e su tempus
est mazande
sas ideas andalusas
de s'omine pertuntu loricau.
S'alinu'e s'antigu berritta
s'est falau in chisina
lassande sa trampa'e su pruere
a si cundire in bratzos de su disisperu.
Bandulera...s'allega'e sa notte
biazat disizande valores
murrunzat passos de falsidade
colat che boja...in s'arcu'e sa estrale'e su sole
lassande farruttas d'ammentos
a si posaren intro s'armarzu
de sos crapicos de sos accordos d'ierru.
Istranzos sos cussizos
pranghen in s'orulu'e sa lughe
iscurtan sentidos iscussertos
"ue sas gaffas cuadas drinnin che campanas
tambande in sas lunadigas oras
chi s'omine mariolat in su computer
e truvat che rellozu issurdiu andalusu...
in sas fritzas lestras de su tempus.
Basta!...inue son finidos?
sos sabores de sas paristorias betzas.
e s'ardore 'e sa terra pruminta.
Nessi un'iscutta...in beranu
mi cherzo torrare a imbrossinare
a bide's'ispiga inzallinde
e in triulas cherzo leare torra fracu'e tricu su manzanu.
Cherzo torrare a intende sas lavadoras
cantande a mutos in sos rios,
e in s'armarzu'e su tempus cherzo servare sos ammentos
po chircare in sa notte sa chimera
cando frorit intro sos bisos...versos libertade...e de poesia.

Cantan sos annos

Terzo al Premio Pattada 2012

Cando sa notte cantan filumenas
frinas isortas paren chi passizen
ispicas frorin a lumes d'isteddos
in custa mente'alu sos cherveddos
paret chi donzi iscutta si nd'abizen
cand'a su tempus li riden sas penas.
E mudu paret donzi curre'e riu
in custa notte chi curren sas oras
e intendo sos sirvones chi pedinde
acchirran pispinnidos e tuinde
in sos ventos chi sulan a disoras
in s'iscurore chi paret cumpriu.
A lampaluche toco sa tiria
chi mi porrit calores de su eranu
e mancu unu disitzu sa chimera
mi porrit in sas chimas de s'aera
chi paset in sa gobba'e su profanu
e su chi cherzo lu disitzo e bia.
Solu marzane s'intendet narande
tirrian sas feras in sos rudes zassos
in sos nuraghes sa vida carfia
bocat sa muffa in sa preda natia
dae s'orizonte sos anticos passos
a passu lentu mi paren torrande.
Nuscos arestes de neulache'e monte
in custu tempus frorin sos beranos
ma custa mente chi paret dolente
irfrunzat galu sentidu a sa zente
e allatat galu luce sos manzanos
intro su nidu chi jugo de fronte.
Oje t'istringo sentidu chin forza
tesso sa tramma che vaidanu'e terra
e ca non pesso lasso s'amargura
in sos predarios de umana paura
galu gherrande che sordadu in gherra
a custos annos li todo s'iscorza.
Appo sinnadu s'anima in s'ostinu
e chin su coro chi jungo sa mente
prendo sa fide b'ennia dae oriente
ch'illanpitzat che sole su camminu.

Chentu messazos

1 premio a Mogorella -11-08-2011

S'intendo musas chi fachene donu
ricamo'e oro chimeras d'incantu
s'arrumbo mudu chin su coro infrantu
biazo chin lampos e tempero sonu
facu tempesta chin s'arridu tronu.
collo in sa terra farruttas'a mantu,
S'ido broccande frinas in'aeras
ricamo grobes chi frorin per'una
si arrumbo tortu chin sa mala luna
isorvo nudos de sas camineras
vardo sos versos postos in isperas
de cada poeta chi chircat fortuna
Si sos iscrittos bocana sa framma
jungo sa notte messande sos bisos
chirco su tempus de sos annos lisos
chi son bolados a tesse sa tramma
chirco su tempus anticu de mamma
in sos ammentos chi paren aricos.
Chirco sapores tra mortos e bios
de mannos poetas chi trazan valores
chirco su grabu sos bonos umores
chi sone mudos a sos ocros mios
sone in su prudere ma son galu ios
impastan galu mundanos sudores.
S'ido sa luche chi paret d'incantu
facu s'inchinu chirco sos abios
mi fachen festa custos ojos mios
pinto manzanos chi frorin'a mantu
iscurto tottu puzones in cantu
e de sos montes sas feras e rios.
Chirco sa notte s'umanu coratzu
cando s'iscuru prendet su caminu
e chin s'anticu prendo cust'ostinu
chentu chimeras frorin su messatzu
fago su locu chirco su passatzu
preco a sa musa versos de continu.
los preco bellos chi parene fronte
cherzo gherrare in mesu s'infinidu
cherzo cumprende "ue soe naschidu
oje in sa terra ...e....eris in su monte.

Chimeras

Primo Premio "Quartucciu 2009" sezione poesie versi liberi

Oje rido.
a s'iscuru a sa luche
a sa vida naschinde
chi ballat
in campuras de pratta
e istudo sos montes
chi allegan
tunchian e vardana
a su nadiu 'e su Sole
inue naschin sas maghias
de chimeras d'attarzu.
Sa neula galu gaente
pintat orassiones de brunzu
e sa terra suorat sa limpida frina
in su surcu 'e s'aera
inue s'isticchin sas illusiones
de picadores d'Isteddos.
Calighes d'umbras
si prenan in sa paristoria'e sa lughe
e collin tisanas de bisos
in mesu s'istiga antiga
e si cundit su primmu ilu'e su manzanu
po dare cria a sa loriga 'e sa vida.
Oje rido
asos astros... a sa luna
a sa mendula in frore
e vardo sas dudas chi mi contan contos
de sas furestas arestes
inue naschin puzones
e allattan sas boghes de sa notte.
Inue coro ninnat sos incantos
De sas mammas feras
In sos rios fadados de s'amore.
Oje rido
a sos marengos de sos annos
ch'impercan astulas de solidade a s'orizonte
e nuda e frazile m'apparit sa chimera
chi pintat in sos ocros mios una terra fadada
e illampizat'a tai...tai...in su nidu 'e sa die noa
po mi... drenare... dae coro... sos fadados disitzos. (Settile)

Chircami

3 Premio a Ossi 2009

Si solu jeo m'intendo e trasandadu
chircami in terra“ue sos veranos
frorin'in sos isteddos in sos pranos
in s'istriulu anticu'e sa chimera
in sas innidas luches de s'aera
de sas lunas caentes c'appo amadu.
Chircami in mare a filu d'orizzonte
“ue su sale isprummat sa maghia
e ispricat in sas undas sa poesia
de su sole sa terra s'infinidu
chircami in custu coro“ue ischidu
ti linghio sas laras chin sa fronte.
Chircami in s'apostu su manzanu
a pilu isortu che una reina
“ue sa pelea e sa vaina
nudda contat'a narre custu cua
inue un'illusione che-i sa tua
juchet funes chi prendet dae lontanu.
Chircami in su canticu'e sas sirenas
“ue sa notte drommit'a dedie
chircami in sos predarios in su nie
galu caente non frittu in coro intendo
sa bertula'e zirellu non mi endo
po sas rosas prus bellas e serenas.
E si cherzo arrumbare in libertade
a b'ide mundu chin su bellu estire
chircami illargu cherzo chi respire
in s'America intro in cussa janna
chin sa nave approdo sa prus manna
chin sos remos anticos d'amistade.
Chircami puru cherzo su dirittu
de ninnire s'amentu chi appo amadu
de sa rosa sa chi appo codiadu
in sos annos chi chinghene s'incantu
chircami...chin sos ojos...ma de prantu
e torro a nue ses tue intas s'est frittu.

Fochiles

Primo Premio Concorso Regionale Sassari Circolo "Culleziu" (25 Maggio 2013)

Berrittas antigas
si son'affummàs
in sos foghiles
de sos nuraghes tuos
o Sardigna,
"ue s'assuttat sa carre
mustrenca
"ue su brigante ridiat a caddu
e sa notte a lughe'e luna
tranbucande un'era lastimosa,
"ue sar bramas de su tempus
murchian sa miseria'e sa terra.
Orassiones de oghu
de pruvera
jumpat sa notte 'e sos tempos
ninninde sos prantos
de su melare arestes 'e sas muvras
lastimau in s'abbuttonadorzu 'e sa
tasca.
S'issaporzu 'e sa die
nuscat
su tintinniu'e su mudrecu'e su monte
"ue sas ruttas orulan s'irfoettu diliriosu
'e sa oghe 'e su entu,
sar feras arestes
murmuttan su diliriu
'e sas traschias luridas de sa notte.
Sos gambales untaos a lardu,
istrissian in s'areste ischina tua
o Sardigna,
trazande sos peccados de su chentenariu
su fusile a bacchetta
priere 'e su lampu'e su oghu
muttiat
sos bandidos a su radunu'e sa cussorza.

Ideas

3-premio Oschiri anno 2000

Mal'assentadas paren sas ideas
in custa notte iscura'e Sant'Andria
prena'e tropeas a cresura ia
assentiladas in largas peleas
millas! chi truvan custas oras feas
chin su punturzu a punta riscarfia.

Intrade ideas craras in su fadu
in pannos d'amistade a fune isorta
s'imprenta de s'anticu no est morta
a prende intro su coro su contadu
aperide sa janna'e su creadu
no est forte che attarzu prus cuntorta.

Rupide torra in terra sas zenias
de mammas de nuraghes a s'assutta
allegan crepaduras'a sa mutta
de predas mannas chi paren dromias
sa rughe de cada anima ch'est ruttu
est galu a ziru in ruttas e lapias.

Benide bos intendo in sa tempesta
in s'alinu'e sa notte sos manzanos
a focu tentu in mesu sos beranos
che virzines prus prontas'a sa festa
che isteddu chi nd'istrissiat in notteta
a sinzolare a bonu custos pranos.

Irvetto intas a tardu unu cussizu
de chimas prus froridas de cossolu
porridas dae columbas in su olu
che pane postu in manu a cada fizu
intrade intro cust'anima a trighizu
pintademi su tempus a sa solu.

Intrade chin sas caras chene gherra
che feras timicosas in sas gamas
intrade a fache nidu che-i sas mamas
chi chircana sa pache in d'una terra
chin laras chi travallana sa serra
intrade a brasa allutta chin sas framas.

Intrade ideas bonas in s'iscuru
cantande che puzone in sas arturas
toddide a sa Barbagia sas cresuras
chi cunzana s'omertade de sicuru.

Jeo s'anima

Primo Premio ittireddu 18-Ottobre 2015 - Sez a verso libero Matteo Spensatellu

Dae s'isteddu
prus artu
vardo a ocros de luna
su ninnire assoladu'e su tramonta.

In su vasu Elicona
biazo...
in s'Universu
e chirco sittos d'oro in camineras.

Intendo zanu zanu...
su murmuttu
'e sa frina
chi ridet a sa notte
e acchirrat a lentore in sas aeras.

Intendo donzi allega
chi muilat in s'iscuru
e parpittat su coro vagabundu.

Su sole m'est amicu
a uppadas de lantias
mi caentat s'issaporzu'e s'esistenza.

Sos chillios de su mare
isprumman chin su sale
sas boghes de sas undas
e allegan a sos montes e a sa terra.

E cammino cammino...
chin sos passos dorados
soe s'anima...chi zirat
chin su murmuttu antigu'e sas aeras
allego chin sos ocros de su entu
e biazo che lumera interi notte
chin sa cara'e sa luna.

Mi sero ins'infinidu
in sa sedda'e su tempus
sonniande sos murmuttos de sa terra

E vardo chene lacrimas s'aera
chi allattat donz'iscutta sa presenza
inue s'iscuru pasat sa clemenzia
in sa notte'e sos tempos post'a ispera.

Jeo su Messia

Poesia dedicata alla santa Pasqua.

Frimat'in que fizu'e sas isperas
e aperi sas oricas iscussertas
cussas fides anzenas sone fertas
ponen'a dubbiu sa sovranidade
de chie est veru rè in beridade
e dominat dae artu'e sas aeras.

Jeo soe babbu'e sos predicadores
e sas manos mi contan sas istimas
de sos craos cravados in sas chimas
de sa ruche chi trazo"ue sa fide
est fatta'e vera lughe po mi'ide
po mi connosche chei su sarvadore.

Jeo Onnipotente chi cumprondas
cantu contat su chelu chi adorat
sa die de sa pache chi colorat
sa puresa'e s'anima in carinnu
si de mene tue cres e si ses dinnu
biaza chin tempus e mai t'arrendas.

No non ti perdas in attera favedda
est furistera cussa mente in que
purrnzada dae atteros inue
bidet su chi non deppede ira mala
est su dimoniu t'est tirand'a un'ala
cantat e godit chin sa missa niedda.

Sonniadore de aeras tue sias...
frunzas de sole pica in cada zassu
ruga su tempus ma mira su passu
si cheres pache chin s'anima canta
precami e implorati a Maria Santa
biaza chin s'umiltade'e sos messias.

Jeo soe su Deu...chi cherzo precadu
jeo soe sa terra su mare s'aera
jeo soe su 'entu su sole s'ispera
sa lughe chi nde pesat su manzanu
jeo...ti aco donu e ti lassare sanu
si cres...a cantu...jeo...happo creadu.

Lunbas de trigu

Eremittas antigos...
perdios...
in scura dinnidade
soliana 'e sa cria 'e sa terra,
arrennadores de entu...
travican galu
sas lunas allatadoras
innidas e piedosas de lacrimas
arestes,
intessias in sos miliares
passilenos de su tempus.

Mimulas de entu...
trasportan sas lunas de trigu
iffustas de prudere 'e nuraghe
jumpande sas tramas de neula
in su chelu
faghendeli s'ispola a sa terra.
Aerzos antigos...
a ispassu
in sos surcos fulanos semenados,
trambugan...sos ojos...sa mirada
in s'istincu lughente 'e s'impudile,
seperande in s'adrommu 'e sas nottes
su suntu 'e sa paristoria
intessia
in sas siendas antigas de Sardigna.

Lunas de trigu..
trisinin galu su fragu contomosu 'e sa tula
murmuttande su tempus mustrencu
'e s'antigu valore...
'ue si son perdios sos bezzos cussizos.
Lassande...
s'antiga berritta chin s'arce manzàs de sudore,
solas...solas...
chin su diliriu 'e sos tunchios de suttaterra.

Mamma

Como t'ido turpa intro sa gama
chin sa corona in manos e umile
a pes'ispartos cara a su fochile
e chircas pessamentos d'una trama
po dares a su tempus menzus brama
ses sempere grabada chin istile
e dias cherre in s'anima servare
s'umanu sentimentu de mi dare.

E pesso cando t'ido bisionande
si galu cussos sonnios son dorados
o si che son in s'anima servados
in versos imortales chi cantande
son paris chin su tempus e andande
intro'e cussu coro amadricados
e dias cherre sempere servare
sa grobe in coro po mi salutare.

E pesso cando t'ido sola sola
ma ricca de virtude chin sos annos
s'amentas bisionande sos mal'annos
bestida chin iscarpas a cattola
chi non risentit dies de iscola
fachende de travallos sos prus mannos
in sos critticos tempos ses colada
ma ricca de salute e consolada.

E pesso a tie zega chene luche
chin pricas a furcone cale fruttu
po paca unu vagotto de curruttu
su tempus t'hat porridu chin sa ruche
un'asche chin sas penas de ti juche
in s'ala d'apartares a triuttu.
ma non ti ses arrendia chin sa fide
mi tocas chistionande po mi 'ide.

Ti deppo custa vida'emmina santa
formada in zoventude dae s'amore
po custa terra rude su fiore
f'ippi in sos bratzos tuos canta canta
da cando in domo nd'happo postu manta
ti pesso in cuntentesa e in dolore
ti vardo in sos chent'annos in sa corte
e t'auguro annos prus... e menzus sorte.

Mannoi Bisaviu

1- Premio concorso Remundu Pira a Villanova Monteleone 1997

T'happ'a chircare in artu in sas aeras
"ue sos isteddos ballan chin su entu
e sa luna sedatat su mementu
in sas trumbas chi sonan sos cussizos
"ue s'anima sa luche sos michizos
comentan de sa terra sas isperas.

T'happ'a chircare postu a una pinna
iffundu'e su nuraghe sepellidu
"ue sa terra su semene chistidu
lassat sos testamentos de cuss'era
in sos passos d'antiga caminera
trampistande sa macra'e sa Sardigna.

T'happ'a chircare in sas lunas de ocu
in s'arrastu'e miliares isconnottos
o in predas de sos montes bene cottos
da-e su sole da-e s'abba da-e su entu
"ue sa luche hat presu su mementu
de custa areste terra a disaocu.

T'happ'a chircare istudande su mare
in cussas abbas virdes tempestosas
a caddu 'e cussas undas sermentosas
po che ide'si che ses intas in cue
o si che ses iffundu ruttu o inue
inue ti ses chertu derramare.

T'happ'a chircare intro'e campusantu
iffundu'e carchi rughe loricà
po ide in sa berritta prudicà
sa manza'e su sudore'e su coratzu
"ue sa limba hat presu su limbatzu
in su rosariu areste'e cussu prantu.

T'happ'a chircare in cust'anima mia
"ue sa madriche est posta in cust'ernessia
"ue su sambene uguale sa cussiessia
lampizat chin sos ojos de cust'era
e brinchiat torra in custa caminera
chin sos passos antigos d'Eremia.

Mammutones

Terzo premio sez.B XXII "CULLEZIU" Sassari

O mamuttone nieddu che-i su moro
ghetta su lovru in custa die frita
tene s'annada ona prus beneitta
e sos disitzos de prendere in coro.

"Uè sas carreras si pesan fulanas
in su predariu anticu cà isprigas
donzi tempus chi curret chin'istigas
in cussas terras de abbas e fùntanas.

Carottas fides e sagras de focu
tra su fummu chi 'olat in sa pratta
pistiddos de inicottu in sa saffatta
c h'addurcan s'amargura in cada locu.

Bolan artos sos fummos de ardore
isprican sas frammas in sa muntanna
s'illuminat in terra cada janna
chin fide c'at intessiu su Sennore.

Chin nuscòs de ormidda s'archimissa
chi cundit custa notte ch'est galana
e cantat cada fera in donzi tana
e frorit in s'artare cada missa.
Est fittianu e sicuru chi non ruet
s'alenu beneittu 'e cada gamma
profumat in su sinu cada mamma
de su piseddu chi naschit e suet.

Est chisjna chi 'olat in s'aera
bardanera chi curret a lugore
e paschen sas ispicas de amore
de su prioradu c'at fattu bandera.

Ses galu sempes tue a tramandare
o Sant'Antoni chi preparas s'annu
de sagras e su foghu meda mannu
e aperis jannas de carrasecare.

In sa chintorza prendes su connottu
de s'antigu prus rustigu tenore
oje est festa manna de folcrore
e tamban sos sonazos d'abbolottu.
Sa maschera'e su tempus a manera
pintada in sa carotta iscarfeddada
pro chi sa fune a lovru ch'est ghattada
prendat in sa Barbagia pache e ispera.

Maria Ortiche

Secondo classificato a Fonni

(Concorso su Sonetto)

25 Giugno 2013.festa San Giovanni Battista

Che tripide addromas su'ochile
fachende mariolas de chisina
a candela allutta in sa cuchina
irvettas s'iscrarire'e s'impuddile.

Sa sughida ti falat in gattile
e sa brusa t'ispricat che lurina
mal'ispertada che una cottighina
irvettas sa toccada'e campanile.

E tucas a su riu garrià
chin sa brocca s'isterzu su tittile
e frastimas sa notte ch'est colà.

Chin sa miseria ses sa prus umile
e sa vardetta'e ortiche ch'est sestà
ti fachtet bella in su tempus ostile.

Omne umile e zenerosu

10/02/2014

A Nino Fois

Como jai t'ido toppu pili canu
in sa cradea settiu mesu ischidu
ma juches galu pricas de sentidu
e a chizu bassu sa mirada leas
ma in cussa mente galu sas ideas
rundan valores sardos galu invanu
e non t'arrendes leas sos sapores
chi timbrana su sardu che sennores.

Colat su tempus paret unu babbu
e nois semmus sos fizos de passazu
tue in sa Sardigna su messazu
lassas chin sa cultura e chin istima
forzis po custu ti ricamo in rima
custas ottadas fattas chin su grabbu
poeta de tempus de valore anticu
juches galu sapores de su tricù.

Arzillu t'happo'istu premiande
che presidente abile e balente
e chin su coro in manos po sa zente
sempes dispostu po sa limba sarda
intas'a sa dis'ora a ora tarda
f'isti galu che mastro ispiegande
son isparinde cuddos piscadores
chi piscana in sa fide sos valores.

Est veru cada caddu che ronzinu
torrat in custa terra de ispicas
a tramandare tottu sas fatticas
a sos chi ponen'a nou sos passos
torran e frorin a nou sos zassos
e curret su sudore in su trainu
e lastimamus sa luce a misura
chin d'unu velu in ojos a cresura.

Tue caru Nino a medas mundanos
has regalau un umiltade istrinta
bivas a longu tue l'happas binta
sa chi has jocadu a sorte s'iscumissa
siat a chent'annos cuss'urtima missa
cando si junghen'a pare sas manos.
tando si pasat in campos de groria
e arrumbas in sa pazina'e s'istoria.

Sonnios de pratta

1 premio Logudoro 09-ottobre 2011

Muttimi intro sa notte galu amore
in custos sonnios mios chi mantenen
sa garria sos sentidos chi trattenen
fados anticos de seda e belludu
soe solu in s'apostu mudu mudu
de tene intessiu jugo su sapore.

Muttimi galu amore in sas oricas
murmuttat galu su tempus d'incantu
torrat'a biu custu coro infrantu
dae custa vida fatta'e milli sonos
solu sos basos tuos fini donos
chi m'isprican in sinu sas isticas.

Ojos de monte secas sas cresuras
de tottu sos misteris chi colados
paren in sa carena appaneddados
che ruches de crofariu a s'acunnortu
benimi accantu galu non soe mortu
istringhemi a cadenas chi misuras.

A frammarida galu cust'incantu
l'istringo che valore intro su punzu
sa notte chin sos ventos a murrunzu
mi porrit cudda allega intro su coro
e custu sambene'alu'e anticu moro
m'iscurret in sas benas no isco cantu.

Chin boches de sirenas sos cantares
si pintana che rajos in su sinu
abbratzami in su sonniu su camminu
diventat lisu chen'esse predosu
in conca su dilema valorosu
ti ponzo che reina in sos artares.

Fachemi cust'iscutta alu sonniare
son'irvaninde custas garrias mias
m'arrunban solu in manos sas poesias
po ti pintare che rosa'e Sardigna
muttimi galu amore ses sa digna
intro su sonniu chi m'as chertu dare.

Culumba rara innida in sa vida
mi muttis in sa notte a luce'e luna
pintada in cust'amore che solu una
ti toco in custu sonniu e ses ischida.

Però jeo t'ido

1-premio concorso Ittireddu 2002

Non zugo ojos....
po ti pompiare
in'intro
'e sa luce 'e s'anima.

Non zugo entu...
po t'irfoettare sos pilos
incadenaos e trozicaos
a s'incantamentu
'e su sole.

Non zugo sa orza...
po traccheddare
sos suspiros caentes de
sos toccos de su coro.

Nòn zugo oricas
po intende sos murmuttos
de sos pessamentos
servaos in'intro'e sos bisiones
selenados de sa notte.

Non zugo laras...
po gustare s'issaporzu
'e sa linfa chi acchirrat lestra in
sos marengos cuaos de s'amore.

Non zugo armonia...
po tuire su rujore caente
'e su tramontu
'e ninnire sa luna
in ninnidos cantos d'ispera.

Però jeo t'ido....
so-e sa (Musa Elicona)
ti pompio in s'istrissiada 'e sa lughe
'e sos isteddos
e bido intessia
sa isione tua in sos pintos arestes d'amistade.

Pilos de piche

2^ Premio al Concorso di poesia "Quartucciu 2010"

Pilos de piche luchidos de antu
intro s'anima mia amadricada
in sa corona'e luce ses sestada
ca tuis su mementu chi m'ischidas
arrumba in s'ala cherzo chi mi ridas
chin cussas laras chi cundin s'incantu.

Una canzone cheres chi ti cante
chin boches chi racaman sas sirenas
frumene'e vida acchirras in sas venas
fachende irmenticare su dolore
benemi accantu e tessi cust'amore
chi su telarzu tù est importante.

Intas in ierru intendo su eranu
cando t'apresias galu a fache nidu
chin suspiros ch'ischidan su ninnidu
e allattan in sa terra cada ungrone
intas in s'abba intendo sa rejone
chi profumat de pache su manzanu.

Che rundinedda galu ser galana
intas si tritzas non falan in cara
ma che rubinu arrumbas perla rara
ca ses sa prima in coro c'appo amadu
intro cudd'era chi pariat furadu
donzi mementu in s'era chittulana.

Cantos ammentos e tottu po tene
sone su sensu chi po custa vida
cundin minuttos e oras de chida
abbaos chin su sambene chi t'untan
sone che froes in coro nd'ispuntan
e trazan in su tempus d'onzi bene.

Beni currende ruca su camminu
chi nos dividit nessi po un'iscutta
galu sa garria inoche no est rutta
toccheddat galu custu coro a forte
beni currende irfida cussa sorte
intas si...in zogu ponzo cust'ostinu.

Tessi s'amore chi filos de seda
fattu de tempus de durches mementos
beni un'iscutta in s'aidu e sor ventos
irvetto unu...asu... chi scherzo dae meda.

Poetas

Semus sos leones de vastu valore
in su predariu sardu disitzadu
inue sas grobes bocana s'amore
e chircana su versu temperadu.

Peri in s'ifferru in mesu su calore
cherimus ponne timbru appaneddadu
d'attarzu interi framma iscarfeddadu
chi su dimoniu timmat su cantore.

Predas de terra ch'impastan sa vida
fizas de tempus cumpanzas de pricas
mantenen galu muros a irfida.

Semus su prudere in mesu sa sida
ammus fraicadu casteddos d'ispicas
chin d'una luche a imprestu chida chida.

Rosa poesia

Menzione di merito al "Quartucciu 2011"

Beni che isposa arcana poesia
settiti in coa ca mi parzo assentu
Faeddàmi in lampos interi su entu
porrimi in carchi musa un'ermosura
istura grobes dae sa seportura
chi mi preguntet cada fantasia.

Dae sa funtana chi t'ido perenne
cantaros cherzo prenos de cuffortu
intas in versos chi lacan'a tortu
mustrami in cada musa sa maghia
e si cumprendes custa vida mia
m'istringhes a su sinu a mi tratenne.

Jeo chi ti chirco cherzo su dirittu
de ti posare inoche carch'iscutta
Chilliami s'anima si paret rutta
e pastina sos versos in su coro
isterremi in sas campuras de oro
sos versos de ispica 'e custu sittu.

Ti pesso settia in arenas de mare
chin mill'isteddos chi rundan'a tie
intro su versu e intritzin in sa die
donzi valore de sa terra anzena
che un' emigrante c'alleviat sa pena
m'intendo si tue pasas su colare.

Che filumena cantami in cust'ora
canzones betzas chi son'in s'armanzu
de cantadores fortes de attarzu
ch'ichintiddana versos de arghentu
t'aperzo una ventana in s'aposentu
intra balente bella e gherradora.

Rosa poesia ghattami su mantu
fattu de frases de sedas de luna
chirco sa luce interi sa fortuna
t'ido rundande in pittu 'e sas aeras
sona chin s'arpa custas camineras
ricamami sa vida chin s'incantu.

Bussa ca carta chin sa manu 'orte
in custa mesa joco sas isperas
pica su picche...lassa sas chimeras
son de su poeta...son de custa corte.

Rosarios d'entu

1° premio Concorso Poesia Sarda - Mores 13
Gennaio 2001

M'an acattare...
iffundu'e su nuraghe
che prudere chi lastimat
s'ammentu
in mesu sos rosarios de
su entu
intessios'a limbazos e
canteras
e campanas ch'istronan
sas lunas
de seculos fuidos in s'aera
e tazana sa lughe'e sas isperas.

M'an acattare....
graminande luche
postu in su corraleddu'e sos poetas
e ruches in sas manos galu nettas
de cudd'umile sardu servidore
e lacrimas de tempus de dolore
chi coronan'a nou sos nuraghes
ann'a esse' po cust'anima ambesues.

M'an acattare....
in mesu sos mannois
adrommande s'arrastu'e s'eremitta
e predas a contones beneittas
chi m'han bistu
moffende custas laras
an'a esse'che miliares
po sas raras
eressias chi sinzolan sa vida
"ue galu cust'anima attrivida
joghittat in sos campos de tiria
suzonande sos tirrios perra perra
de sos surcos profanos de sa terra.

M'an acattare...galu in sa sardigna
in mesu sos frundacos de su ludu
iscurtande su riu mudu mudu
chi trazat su diliriu'e sos antigos
e lavat sos arrastos cuddos sicos
chi nd'an fattu s'istirpe...pinna...pinna.

Rosas de brunzu

2 –Premio Al Concorso Letterario Regionale di poesia “BROTU SARIPA” Città di Sassari
All'amico scomparso Mario Fronteddu Serafino di Dorgali

Mustazos de ideas
chi cundannais s'omine a sa sorte
manucros de tropeas
moffet che canna s'anima in sa morte
un'asche de sentidos
toccan sa janna e galu son'ischidos.

Lacrimas d'una ruche.
ispartas in sa neula son carfinde
e coa'e pedde mutruche
a poddiche puntadu t'it muttinde
su camminu predosu
diventat lisu nou e isperanzosu.

Inue as'a chircare.
s'umana raichina'e su bisonzu
eternu at'a gosare
su sinnu de sa vida su cantonzu
si prus non b'at lugura
solu s'iscuru cundit s'amargura.

Che lande son falados
e amadricados in sa terra antica
cussos sonnios fadados
chircande torra luche torra istica
in arcanos aerzos
s'han toddiu su ortiche che suerzos.

Iscuttas passizeras.
chi cundannais galu su mementu
de cussas camineras
ispartas'a chisina torra a bentu
son chimeras d'attarzu
las servo che l'has ponzo in d'un'armarzu.

Su tempus t'at negadu.
sos bisos galu ch'in coro tenias
poi t'at regaladu
iscuttas bellas de vida e armonias
che puzone su'olu
as'ispiccadu in artu solu solu.

Sone rosas de brunzu
chi toco in cussa losa su mementu
istrinta'alu in su punzu
arrumat s'amichessia a sentimentu
e mancu unu saludu
m'has dadu e ses partidu mudu mudu.

Sa Dispedida

Primo premio-sez rima Ossi-2010
Poesia dedicata a Francesco Merù

Galu valores moffene che canna
moffen'a bentu chillian in s'aera
unu sentidu de astula braghera
paret muttinde torra a boche manna.

Ippi irvettande'alu unu carinnu
unu saludu imberty da-e Milanu
ma puntu mat'a istillu chin sa manu
su tempus ch'it porrindemi su sinnu.

Unu luna de piche in mesu esta
iscuricande in bratzos de sa sorte
chin sos rajos iffustos de sa morte
fit zirande una lantia che tempesta.

A irgramios un'istria a biccu vertu
in costas d'una jaca s'impuddile
e canes ritzos ritzos in quile
a zarulos de vronte a campu apertu.

Bentos de travuntana e de traschia
sulana fritta sa cara'e sa vronte
a filu tamban forte in s'orizzonte
sas campanas prus rudes d'agonia.

Chentu chimeras in sa losa tua
fadadu tan che mastro su mementu
e precos de rosarios tra su entu
si son'isortos chin s'anima a cua.

Pintores de su chelu ti tinghian
cristallos a funtanas de maghias
e riflessos de rimas de poesias
in s'arcu 'e s'orizzonte ti ninnian.

Oje chirco un'amicu caru inoche
chi mi tinghiat de oro cad'idea
custu dolore mancu s'istadea
lu pesat ca lu prango chin sa oche.

A toccos de balente in mes'iscuru
ispronat cada vrina su ponente
su saludu mundanu a custa zente
ar dadu chin s'estremu de sicuru.

Inoche so-e ocannu amicu miu
a tessu custa grobe in su telarzu
che fera in fritta notte de frearzu
t'intendo in cussa...losa...affritturiu.

Sa medalla a su valore

1- premio concorso di poesia sarda Oniferi Maggio 2003

De sa secunda gherra'onzi lamentu
bos conto in custa sera frittulana
donzi dolore intessiu'onzi turmentu

Trazo unu mannu pesu chene gana
chin sos sinzales de sa pizzinnia
sempere in carrozzella in custa tana.

Che unu relittu 'e sa gherra finia
e partiginas lacrimas de prantu
mudas in sa carena irvania.

Bos'isterro su contu in d'unu mantu
e sa medalla mustrat sor valores
de cudd'era chi bramatu sol'ispantu.

Potto contare a mannos e minores
desse'iscampau in su trinzeramentu
in prima linea a bombas e terrores.

Isparande a nazistas contra bentu
ruttu so-e in su nive, e so-e chistidu
in maladies de su conzelamentu.

Prenu'e caentura tott'affrittoridu
lassand'amigos in lampos de oghu
a s'ospidale ruttu m'an battidu.

A che torrare a inoghe non fit zoghu
chene bratzos ne ancas e nen pese
como so-e inoghe settiu zegu a toghu.

Iscompau a sa sorte tue sese
mi naran topu arzu e a su manizu
de cussas lunas nieddas de su mese

Cando conto s'istoria a carchi fizu
e lastimo cumpanzos de sa gherra
mi naran ...tue ses-biu... in martirizu.

Ma pessa cantas rughes son'in terra
cantos sordados mortos chene tumba
cantas pessones orfanas de gherra.

Iscurtana pranghende s'innu a trumba.

Tattaja

Menzione d'onore premio Berchidda 2015

Che fada....
reposas....
cantande sa terra
e in pojos de lunas
ispricas sa cara
c'allattat su tempus areste.

Tattaja de sinu
s'amentu non morit
su primu alimentu has porridu
cantande sos muttos anticos
che rosa'e padente chi hat presu
a catena su coro'e sos fizos.

Che rosa tue arrumbas...
in mesu sas frinas isortas
chi acchirran e mudan sa terra
cossolu de mammas mundanas
punidas dae iras de chelu
sos boidos crapicos has bistu
pedinde perdonu a su tempus.

Fuida ti ses...
in oras d'attarzu
c'han tintu de bronzu
sas predas de s'anima
e fizos de titta ti chircan gal'ora
in prueres d'ammentos
allegan in mesu s'iscuru.

Fuida ti ses...
in trenos de chelu
biazande in su tempus chi bramat su eranu
e frores de seda ti chircan che mamma
frorinde in sa tula'e su sole.

Chin abbas de luche
pinzellos de sinu e d'amore
t'han tintu de groria
e ti ponet a luche in sa losa unu frore.

Fuida ti ses...in mesu su tempus chi curret
porrinde cuss'urtima titta
chi tessit sa neula interi chimeras anticas.

Trint'annos bandidande

Appo lassau sos montes de idda mia
fuiinde da-e sa terra'e su turmentu
appo lassau in groppas de su entu
tunchios arestes de terra gattia.

Appo lassau bestiamene'e cussorza
chin lacrimas de sambene'e amargura
po picare cust'andala ch'est dura
chene la cherre ma picà chin forza.

Appo lassau murallas e nurache
in sa idda'e sas faidas de sa morte
appo lassau in brazzos de sa sorte
sos juncos betzos de su malu'ache.

Appo lassau prantos chin lamentu
de s'amada familia e zente mia
appo lassau a sa luna cumpria
sa fide...chin s'antigu testamentu.

Appo chertu picare cust'istrada
po sarvare sa fronte 'e s'innozzente
sos imboddios tropellos de sa zente
ponen'in rughe sa manna cuntrada.

E notte de traschia appo connottu
appo istu intemperias e malannos
ispada tratta punta a sos ingannos
currezinde sa vida e s'abbolottu.

Sa luna m'est cumpanza chin su entu
s'alimentu est (preda) 'e sa natura
m'addurcat custa vida troppu dura
arrumbo carch'istante su cuntentu.

A sa zustissia intantu non mi rendo
chin balentia sigo a bandidare
ca de coratzu nd'appo po nde dare
su ilu'e custa vida in coro intendo.

Irvetto tarda notte a m'ispostare
cumpanzu m'est s'ostinu in custa sorte
est bene istrintu intas'a sa morte
isterriu...in sos suerzos seculare.

Vardettas

2-Classificato premio Montanaru 2007

Ite pessos...
tocande sa corona
e irgranas
sos rosarios d'una jana...
femmina dolorosa
'e sa Barbagia,
chi estis
chin sa brusa murriniedda,
ses mamma d'una faida
remittana...
e frastimas sa luna beffulana
pintada che una mascara niedda.

Sas campanas prus mudas in s'aera
so-e intendende
sonande a toccu lentu...
e custu tempus pranghet risuluttu
sa pena'e custos fizos in su luttu
chin lacrimas de sale e d'amargura.
e fringhen'in cust'era prus madura.

A ue tempus...ses currende solu...
Sos fizos son che feras in sa notte
son pentumas arestes de sentidos,
e preides in sa rughes son chistidos
in caminos de gloria a dolu chintu,
de samben sos trainos an'intintu
in'inpuddiles nieddos de sa sorte.
chin un'urtima...missa...estia'e morte.

In pittu...
de sa brasa allutta in foghu
ballande son sos coros in disterru
troppu lunas mustrencas d'un'ifferru
illampizan sos chelos de Barbagia,
ma una lughe in su sinu bisonzосу
e unu frore'e perdonu irmentigadu
in sa janna e sa dommo'e su creadu
cheret ponne su... Deu... isperanzosu.

E in s'iscuru...
una framma... èst una chera...
unu cantigu areste d'un'istria...
e una...mamma...in breucus...d'un'ispera.

Zovanos noales

O zovanos noales chi fughides
in groppa custa terra ch'est presente
lassade sa discordia prus assente
chircade chin su grabu bon'istima
ponide s'amargura in cada chima
in mesu 'e cada edade chi cherides.

Cale menzus sas novas de intende
in s'abbruzzu 'e sas oras d'impuddile
una mama disizat in giannile
sa fortuna a su fizu po sa paca
che anima de mundu ch'est teraca
disizat solu custu po prettende.

In sas prattas isterret sos amentos
de sa vida prus dura po l'ischire
cantas penas connottas po servire
si colat trambucande* in custa vida
e una cossorza ispoza estia 'e sida
chi contat sos arestes pattimentos

* camminando e cadendo

Iscuridade sas campanas fiudas*
chi tambana sos montes iscuriade
istronana che cantos di amistade
chillian in sas campuras tra sas predas
sos sinnos de amores paren sedas
sos cantos de nuraghes tra sas dudas.

* ronzando

de sa terra collide su lassadu
de s'antigu collide sos valores
son galu intro su prudere sos sapores
alluen bisos bellos in s'aera
feccundat de orgogliu cad'ispera
po apprende s'onestade e su creadu.

E un'innidu discursu tra sos sinnos
ch'intessat in sos zovanos cuffortu
lassadelas sas lunas d'acunnortu
c'han bistu troppu faidas disisperu
lassade su grongone* e craru abberu
bestide su ... perdonu ... in sos carinnos.

* amarezza - rabbia